

相隔 10 年再出情歌

江若琳放開前度 再見不是朋友

歌手江若琳（Elanne）相隔 10 年，終於推出全新情歌《流著淚寫句號》，分享這些年她在愛情路上的經歷。她藉着新歌鼓勵失戀的粉絲要學識放手及向前看，覺得祝福前度更重要。她坦言很難與前度做回朋友：「如果當初冇放手，就未必會遇到依家身邊真正啱嘅人。」

江若琳新歌 MV 邀得好友張繼聰做男主角，講述一對情侶由相戀到分開，學會放下執着與遺憾，衷心祝福對方擁有更美滿的人生。Elanne 說：「我一聽到 MV 故事，發現需要演技，就決定親自上陣。至於對手演員我第一時間諗起張繼聰，一位我近年好欣賞嘅演員。其實當時都未落實拍攝細節，但我已經打電話問佢可唔可以幫手！」張繼聰毫不猶豫答應：「娛樂圈本來就應該互相幫忙。見到 Elanne 有幸福家庭，仲繼續追夢，當然要義不容辭啦！」

與張繼聰奉旨發脾氣

兩人在 MV 飾演情侶，問到會否感到尷尬？張繼聰笑言：「我身為一個專業演員，唔會覺得尷尬！」Elanne 亦說：「唔尷尬！但唯一要求係我老公唔可以在場，因

為佢睇住我會演得唔夠放！」MV 不乏爭執場面，兩人拍掃枱、捉嘢、發脾氣等場面真情流露。身為愛妻號的張繼聰為自己平反：「我同老婆平時幾乎冇咩爭執，因為夫妻相處講求融洽，先可以行得長久。」Elanne 亦說：「我同老公 Oscar 由拍拖、結婚到生 BB，當然有鬧過大交。但係人大咗，感情變得更成熟，識得冷靜處理，鬧完交都會坐低溝通。如果唔係，就真係變前度。」

Elanne 續指：「今次拍 MV 都有諗番以前嘅經歷，我覺得我自己比較難同前度做得番朋友，因為我覺得要 move on，學識放手、祝福對方更重要，大家各自安好就足夠。如果當初冇放手，就未必會遇到依家身邊真正啱嘅人。我希望粉絲可以透過首歌，同我一齊成長。」



■張繼聰與江若琳於 MV 不乏爭執戲。


■江若琳再戰樂壇，粉絲興奮萬分。

■兩人都是演技派，擦出火花。

許家傑正視生死 「最可怕係唔面對」

許家傑與曾寶儀日前出席善寧會與癌症資訊網慈善基金舉辦的電影《交換禮物》慈善優先謝票場，許家傑讚電影很感人：「電影最震撼我嘅係一個想法，就係每一件事都係客觀，你點去睇呢件事就係主觀嘅心。就好似死亡一樣，好多人好驚，唔敢面對，但其實最可怕就係唔敢面對。」

他認為生命不在乎長短，最重要是病患者面對治療的痛苦，仍然努力希望活下去，感受到他們對生命的熱愛。多次到賽馬會善寧之家探訪的他說：「雖然好多患者已經到達生命晚期，但佢哋仍然好珍惜去享受同活好每一日。死亡或者癌症一直係好多人忌諱唔想講嘅話題，總係覺得好負面，其實生老病死係每個人必經階段，反而我哋應該學習面對，早啲正視絕對係一件好事。」



■許家傑於謝票場分享睇戲感受。

Candy 曾失去自我

女團 COLLAR 於 ViuTV 節目《COLLAR 以為去度假》進行 Life Journey 營火會，各自分享人生旅程。Candy 表示當初加入 COLLAR，純粹喜歡表演，很開心覺得好似完成夢想，但出道一年後慢慢多了很多顧慮，覺得以前的自己好像已不存在，尤其去年情緒比較低落，所以決定要重新管理一個健康的生活。Winka 坦言曾經覺得自己對 COLLAR 貢獻不大，感到很愧疚，更叫公司不要幫自己出歌，最後很感激公司沒有放棄自己。



■Candy 自爆去年情緒低落。



■阮浩棕難忘與嫻嫻合演劇集的日子。

阮浩棕拍劇冇準備好捱鬧

阮浩棕於無綫節目《人生美食地圖——東京篇》，分享當年與嫻嫻梁舜燕唯一合作劇集《EU 超時任務》的難忘點滴：「有嫻嫻帶住我，就算幾困難，都有種好親切同好平靜嘅感覺包圍住我。」對於外間曾指他「因嫻之名」才有今日的成就，他坦言作為「上等孫」，確實多了工作機會，但若果準備不足，再多的機會也是徒然。他自爆試過未準備好，拍劇時被狠狠教訓：「拍《為食神探》嗰陣俾人鬧到飛起！每日返工都頭耷耷，全部談情嘅戲都做唔到，因為演得唔夠放。」